

ואם־זבח שלמים קרבנו אם מן־הבקר הוא מקריב אם־זכר אם־נקבה  
תמים יקריבנו לפני יהוה:

וסמך ידו על־ראש קרבנו ושחטו פתח אהל מועד וזרקו בני אהרן  
הכהנים את־הדם על־המזבח סביב:

והקריב מזבח השלמים אשה ליהוה את־החלב המכסה את־הקרב  
ואת כל־החלב אשר על־הקרב:

ואת שתי הכלית ואת־החלב אשר עלהן אשר על־הכסלים  
ואת־היתרת על־הכבוד על־הכליות יסירנה:

והקטירו אתו בני־אהרן המזבחה על־העלה אשר על־העצים אשר  
על־האש אשה ריח ניחח ליהוה:

ואם־מן־הצאן קרבנו לזבח שלמים ליהוה זכר או נקבה תמים  
יקריבנו:

אם־כשב הוא־מקריב את־קרבנו והקריב אתו לפני יהוה:  
וסמך את־ידו על־ראש קרבנו ושחט אתו לפני אהל מועד וזרקו בני  
אהרן את־דמו על־המזבח סביב:

והקריב מזבח השלמים אשה ליהוה חלבו האליה תמימה לעמת  
העצה יסירנה ואת־החלב המכסה את־הקרב ואת כל־החלב אשר  
על־הקרב:

ואת שתי הכלית ואת־החלב אשר עלהן אשר על־הכסלים  
ואת־היתרת על־הכבוד על־הכלית יסירנה:

והקטירו הכהן המזבחה לחם אשה ליהוה:  
ואם־עז קרבנו והקריבו לפני יהוה: